

1 Samuel

Profet Samuel kenta intäjukun äma Saul unitäño manbiñam

1 Samuel 3:1-10

Yawetä Samuelta gera yänjuk

¹Äma gubañi Samuel Yawe täño epän täk täñkuko u Elitä watäni irirän täk täñkukonik. Kadäni uken Yawe täño man kotäktä Isrel ämawebeken mäyap nämo ahänjuk. Ba ayäbu terak imaka, kadäni mäyap nämo ahäj yämiñjuk.

²Tänpakañ kadäni uken Eli täño dapuri wañirän dapuri itpipiwayäj täñjuk. Eruk bipani kubäken Eli uwä Yawe täño kudupi yot gänañ ini përaniken patkuk. ³Parirän Samuel uwä Anutu täño topmäk-topmäk unitäño gäpe pewaniken kudupi yot gänañ u patkuk. Kome nämo yäñejirän Anutu täño topän u pen ijiñ itkuk. ⁴Eruk Yawetä Samuelta gera yänjuk. Gera yänjirän ñode yänjuk; Ei, näk itat ño! yäk. ⁵Ude yänpäj bäräñej pänku Eli iwetkuk; Näka gera yänpewi äbätat yäk. Ude yänjirän Elitä iwetkuk; Näk gäka gera nämo yät. Äneñi kuñkañ päsi yäk. Ude iweränä pänku patkuk. ⁶Eruk, äneñi pänku parirän Yawetä Samuel! yäj gera yänjuk. Ude yänjirän nadänpäj Samueltä akumañ Eliken äneñi kuñpäj iwetkuk; Näka äneñi yänpewi äbätat yäk. Yänjirän Elitä iwetkuk; Nanakna, gäka gera nämo yät. Pänku äneñi pat.

⁷Tänpakañ Samuel uwä Yawe täño kotäk nämo nadäk täñkuko unita Yawetä gera yänjirän nadäj urukuruk täñjuk. ⁸Eruk, Yawetä Samuelta gera äneñi yänjirän kadäni yaräkubä täñjuk. Yänjirän Samuel äneñi akumañ Eliken kuñpäj iwetkuk; Näka gera yänpewi äbätat yäk. Tänpakañ Elitä ñode nadäwän tumbuñ; Yawetä ini yäyak yäj nadänjuk. ⁹Ude nadänpäj Samuel iwetkuk; Äneñi pänku pariri gera äneñi yäwänä kañ iwet; Yawe, näwet. Epän ämaka jopi näk man jide näwerayäj täyan unita juku päram täyat. Ude iweränä Samuel pänku patkuk.

¹⁰Pänku parirän Yawetä äbä dubiniken itkaŋ gera pengän kadäni yarakubä yänkuko udegän yänkuk; Samuel! Yänjirän Samueltä yänkuk; Näwet! Epän ämaka jopi näk man jide näwerayän täyan unita juku päram täyat.